

20 JAN 1998

Muhyiddin - Ekonomi

PLAN TINDAKAN BELIA TANGANI KEGAWATAN EKONOMI SEDANG DIRANGKA

MELAKA, 20 Jan (Bernama) -- Kementerian Belia dan Sukan sedang menyediakan program bagi mengembeling tenaga belia secara besar-besaran bagi membantu negara menangani masalah ekonomi.

Menterinya Tan Sri Haji Muhyiddin Yassin berkata program itu menyeluruh itu melibatkan persatuan-persatuan belia dan pertubuhan bukan kerajaan .

Program itu sedang dirangka dibawah satu plan yang dinamakan "Plan tindakan menyeluruh untuk menangani masalah ekonomi daripada perspektif belia", katanya kepada pemberita selepas menghadiri majlis berbuka puasa bersama pemimpin belia negeri di sini semalam.

Muhyiddin berkata plan itu dirangka oleh sebuah jawatankuasa yang melibatkan wakil persatuan dan pertubuhan belia, universiti dan agensi-agensi kerajaan.

Antara aspek penting program itu ialah kempen penerangan, kempen jimat cermat, kempen membeli barangan tempatan dan kempen meningkatkan pengeluaran makanan, katanya.

Beliau berkata usaha penerangan yang meluas dan jelas mengenai isu yang menyebabkan berlakunya masalah ekonomi adalah penting supaya belia lebih faham dan bersedia membantu menangani masalah yang dihadapi.

Katanya, satu perhimpunan melibatkan kira-kira 2,000 pemimpin belia seluruh negara akan diadakan bulan depan sebagai pelancaran kempen penerangan itu dan Perdana Menteri Datuk Seri Dr Mahathir Mohamad akan dijemput merasmikannya dan berdialog.

Beliau berkata dalam usaha berjimat cermat dan membeli barangan tempatan, peranan belia yang merupakan kelompok pengguna yang besar adalah penting bagi membantu usaha kerajaan ke arah mencapai matlamat itu.

Bagi menjayakan usaha meningkatkan pengeluaran makanan, Muhyiddin berkata penglibatan belia dapat digembeling dengan kerjasama kerajaan negeri dan agensi kerajaan bagi menyediakan tapak atau input peralatan, benih atau haiwan ternakan.

Beliau juga berkata pelan tindakan itu adalah satu program yang diyakini akan menghasilkan perolehan atau hasil yang agak cepat bagi membantu mengurangkan masalah ekonomi negara. --BERNAMA

MOZ WAT